

GAJI MINIMUM BARU DEKA DITERITKA KENA 1 JULAI

12 May 2016

- **The Borneo Post Online**
Dikarang Rengenyang Labang

KOTA SAMARAHAN: Penyampau gaji minimum baru ti udah diubah tetap deka dipejalaika 1 Julai tu sereta enda tau enda dititihka pengaji.

Direktor Opis Tenaga Kerja (JTK) Sarawak Datu August Buma madah, JTK enda nerima sebarang peminta ari pengaji ti deka nangguhka mayar gaji minimum nya.

“Baka ke udah ditemu kitai, penyampau gaji minimum ke baru ti diubah deka dipejalaika 1 Julai. Nadai ditangguh agi. Ba Sarawak gaji minimum iya nya RM920.

“Semua pengaji patut nitihka atur nya lalu kami udah nerima gerah ari opis menteri (Opis Menteri Penguasa Pengereja Pengawa) ngambi bejalaika atur ti terit pasal gaji minimum RM920, untkup Sarawak.

“Opis menteri begulai enggau opis kami deka betemu sereta berandau enggau bala pengaji nyengkaum pengereja pengawa bekaul enggau penyampau gaji minimum ke baru tu,” ku iya seraya madahka gaji minimum Sarawak, Sabah enggau Labuan iya nya RM920.

August mansutka pekara nya lebuh dikerandau pengarang berita bekaul engggau gaji minimum di Sarawak, maya ti ngulu sebengkah program di UNIMAS, kemari.

Nitihku iya, serata nengeri bisi 16 iku pemesai penerit adat ke deka bejalaika pengawa betemu enggau bala pengaji.

Iya ngarapka pengereja pengawa ti enda dibayar nitihka gaji minimum, ngeripot sereta mai nya kes ngagai JTK.

Ukum ke diberi ngagai pengaji ke enda nitihka atur iya nya RM10,000 ke tiap iku pengereja pengawa ti enda dibayar tauka diukum jil setaun, ku iya.

“Dalam kes ti didawa, kort majistret ngukum sida RM2,500 ke tiap iku pengereja pengawa tauka nyema enda tebayarka ukum nya, deka diukum jil tiga bulan.

“Kami amat serius dalam pekara tu, kami ngelalau pengaji ngambika nitihka undang-undang laban lebuh kami nawa, ukum nya dibaruh kuasa kami, bepanggai ba akim enggau kort majistret,” ku iya.

Nambahka nya lebuh ditanya bekaul enggau pemayuh pengaji ke enda ngaji nitihka gaji minimum, August madah, naka ke diatu bisi 14 keretas tasat pasal enda ulih mayar gaji minimum lalu dua ari nya pengaji besai dalam industri hotel ti mungkur lebih ari 100 iku pengereja pengawa.

“Kami bisi ngukum tiga pengaji ti enda tebayarka gaji minimum, keterubah di Miri (industri servis) lalu dua minggu ke udah kami nawa dua pengaji (industri servis) di Kuching. Sida nya diukum kort.

“Tebal agi kes nya bekaul enggau industri servis dalam industri dagang mit enggau tangan pemesai (PKS).

“Ketegal nya, kami deka mekuh ngagai industri PKS,” ku iya seraya madah deka ngeluarka penerang berita pasal pekara nya sehari tu.

Kelimpah ari nya, lebuh ditanya sekali JTK bisi nerima ripot pengaji enda ngemendar pengundi nurun ngundi maya pengawa bepilih tu tadi, August madahka sida nadai nerima sebarang ripot.

“Naka ke diatu, manah. Kami bedau nerima sebarang ripot. Nyema kami bisi nerima ripot, kami deka bejalaika atur ke patut,” ku iya.

Pengaji ke enda ngemendar pengereja pengawa nurun ngundi ulih ditinggang ukum dibaruh Seksyen 25(3) akta Kesalahan Pilihan Raya 1954.